



JABATAN PERKHIDMATAN VETERINAR

LAPORAN LIPUTAN MEDIA

20 JUN 2023, SELASA

Kelantan perintis makanan ternakan kenaf

MEDIA	RUANGAN	MUKA SURAT
Sinar Harian	Terengganu/Kelantan	25

Kelantan perintis makanan ternakan kenaf



Wan Abd Rahim (tiga dari kanan) selepas mempengerusikan satu mesyuarat di Lembaga Kenaf dan Tembakau Negara (LKTN), Kota Bharu pada Isnin.

KOTA BHARU - Kelantan dipilih sebagai perintis memulakan Program Pembangunan Industri Berasaskan Komoditi Kenaf Untuk Makanan Ternakan yang bermula tahun lalu.

Pengerusi Lembaga Kenaf dan Tembakau Negara (LKTN), Datuk Wan Abd Rahim Wan Abdullah berkata, setakat ini sebanyak 30 hektar kenaf ditanam melibatkan 200 petani.

Bagaimanapun katanya, LKTN menyasarkan sebanyak 200 hektar pokok ditanam tahun ini.

"Setakat ini hasil untuk sekali tuaian memecah sehingga 10 tan," katanya ketika sidang akhbar kepada pemberita selepas mempengerusikan satu mesyuarat di LKTN di Kota Bharu pada Isnin.

Jelasnya, percubaan berkenaan lebih kepada kegunaan dalam komuniti di Kelantan dan hanya melibatkan jualan antara petani dan terus kepada penternak.

Beliau memaklumkan, tanaman kenaf boleh dipetik dalam usia antara 30 hingga 35 hari untuk dijadikan makanan ternakan, silaj dan pelet kenaf.

"Kajian yang dibuat oleh Lembaga Minyak Sawit Malaysia (MPOB) sekitar tahun 2013 hingga 2015, tuaian dapat dilakukan sehingga enam kali setahun cuma cadangan mungkin hanya tiga kali sahaja," katanya.

Menurut beliau, dalam tempoh percubaan itu pemotongan hanya dilakukan secara manual melibatkan bahagian pucuk sahaja.

"Kita akan membangunkan satu jentera tuaian pada masa depan yang membolehkan pemotongan pucuk seperti sistem pemotongan daun teh," katanya.

Tambah beliau, setakat ini tanaman di Pasir Puteh dan Pasir Mas dihantar ke Kampung Banggu untuk kegunaan penternak setempat.

Ilmu penternakan, pertanian diterapkan di Tahfiz

MEDIA

RUANGAN

MUKA SURAT

Utusan Malaysia

Dalam Negeri

36



PELAJAR tekun mengikuti salah satu silibus pendidikan di madrasah tersebut. - ARRADHI & IKMAL



ZARIF Darwis (kiri) bersama rakannya memberikan makanan kepada kambing yang ditenak di Madrasah An-Nuur (MAN).

Oleh MOHAMAD HAFIZ
YUSOFF BAKR
hafiz.yusoff@redamulia.com.my

Ilmu penternakan, pertanian diterapkan di tahfiz

MASIH ada masyarakat kita berpandangan pusat tahfiz hanya tempat melahirkan penghafal al-Quran atau mereka yang mahu memberi fokus dalam bidang ilmu agama.

Paling menyedihkan, pelajar pusat tahfiz sering dituduh tidak mempunyai masa depan dan institusi itu bukan tempat untuk golongan profesional.

Bagaimanapun, tanggapan tersebut sebenarnya silap dan kini sudah ramai ibu bapa yang mahu menghantar anak-anak menuntut ilmu di pusat berkenaan.

Hal itu kerana pusat tahfiz bukan sahaja menyediakan silibus pendidikan agama, tetapi turut mendedahkan pelajar dengan pelbagai ilmu kemahiran hidup lain antaranya penternakan dan pertanian.

Pendekatan itu diterapkan di Madrasah An-Nuur (MAN) di Johor yang kini mempunyai lebih 80 pelajar.

Pengasasnya, Noor Effendi Hamid berkata, pelaksanaan silibus ilmu kemahiran hidup dilihat penting untuk memastikan pelajar mampu berdikari dan dapat memberi keseimbangan antara ilmu dunia serta akhirat.

Menurutnya, pelajar di pusat tahfiz itu boleh memilih bidang lain berdasarkan minat sama ada untuk membantu penternakan kambing, bercucuk tanam, menternak kelulut atau dalam



NOOR Effendi (kanan) bersama pelajar tahfiz melihat kaedah mendapatkan madu dari salah satu sarang kelulut baru-baru ini. - ARRADHI & IKMAL

bidang kimpalan besi sebagai sebahagian silibus dengan ilmu selain subjek berkaitan pendidikan agama Islam.

"Semua pelajar di sini sudah ada jadual harian mereka sendiri, biasanya pada waktu petang mereka membantu di kebun dan juga bertugas di kandang kambing.

"Kalau mereka tidak berminat dalam kedua-dua bidang ini, pelajar turut diajar untuk berniaga kecil-kecilan. Mereka bebas untuk menentukan minat sendiri," katanya kepada Utusan Malaysia baru-baru ini.

Madrasah An-Nuur yang terletak di Parit Sekoyan Laut, Kesang Laut, Muar mempunyai ladang seluas 0.80 hektar yang diusahakan sejak 2013.

Ladang milik madrasah itu memiliki beberapa hasil tanaman lain antaranya jambu batu, ternakan kelulut dan kandang yang menempatkan lebih 60 ekor kambing.

Tambah Noor Effendi, pusat tahfiz itu turut mewajibkan para pelajar menduduki Sijil Pelajaran Malaysia (SPM) dan memastikan mereka mencapai keputusan yang baik.

"Kita mahu melahirkan peguam, doktor, arkitek, juruterbang dan golongan

profesional yang tidak dipisahkan dengan ilmu agama dan al-Quran," jelasnya.

Sementara itu, seorang pelajar, Zarif Darwis Muhd. Zaki, 15, teruja dapat membantu kerja-kerja di ladang kerana mempunyai minat mendalam terhadap bidang penternakan.

"Sejak kecil saya membantu ayah menguruskan lembu-lembu dan saya seronok kerana dapat meneruskan minat saya di sini.

"InshaAllah mungkin satu hari nanti saya boleh menjadi penternak berjaya," ujarnya.

Bagi Guru Penolong Kanan 1 madrasah itu, Muhammad Firdaus Ismail berkata, sebanyak 40 pokok rock melon ditanam secara fertigasi selain cili.

"Kami bercadang untuk menanam lebih 1,000 pokok rock melon lagi selepas ini di samping akan memulakan penternakan ikan keli.

"Pada peringkat awal, ikan-ikan ini akan digunakan untuk memenuhi keperluan di madrasah dahulu sebelum boleh dipasarkan ke tempat lain," ujarnya.

Madrasah An-Nuur turut dilawati pelbagai pihak termasuk Jabatan Pertanian dan Jabatan Perkhidmatan Veterinar bagi melihat dan membantu projek berkaitan.

TERIMA KASIH

DISEDIAKAN OLEH:

**UNIT KOMUNIKASI KORPORAT
JABATAN PERKHIDMATAN VETERINAR**